

С нами Бог

обиход

С нами Бог, разумейте языцы, и пока - ряй те ся: я - ко с на ми Бог.

Подобным образом исполняются и остальные стихи:

Услышите до последних земли: Яко с нами Бог.

Могущии покаряйтесь: Яко с нами Бог.

Аще бо паки возможете, и паки побеждени будете: Яко с нами Бог.

И иже аще совет совещаваете, разорит Господь: Яко с нами Бог.

И слово, еже аще возлаголете, не пребудет в вас: Яко с нами Бог.

Страха же вашего не убоимся, ниже смутимся: Яко с нами Бог.

Господа же Бога нашего Того освятим, и Той будет нам в страх: Яко с нами Бог.

И аще на Него надеяся буду, будет мне во освящение: Яко с нами Бог.

И уповая буду на Него, и спасуся Им: Яко с нами Бог.

Се аз и дети, яже ми даде Бог: Яко с нами Бог.

Людие ходящии во тьме, видеша свет велий: Яко с нами Бог.

Живущие во стране, и сени смертней, свет возсияет на вы:

Яко с нами Бог.

Яко Отроча родися нам, Сын, и дадеся нам: Яко с нами Бог.

Егоже начальство бысть на раме Его: Яко с нами Бог.

И мира Его несть предела: Яко с нами Бог.

И нарицается Имя Его, велика совета Ангел: Яко с нами Бог.

Чуден советник: Яко с нами Бог.

Бог крепок, Властитель, Начальник мира: Яко с нами Бог.

Отец будущаго века: Яко с нами Бог.

С нами Бог, разумейте языцы, и покаряйтесь: Яко с нами Бог.

Слава Отцу и Сыну и Святому Духу: Яко с нами Бог.

И ныне и присно и во веки веков. Аминь: Яко с нами Бог.

С нами Бог, разумейте языцы, и покаряйтесь: Яко с нами Бог.